

大智度初品中十喻釋論

第十一(第六卷)

龍樹菩薩 造

後秦龜茲國三藏法師鳩摩羅什奉 詔譯

【經】

大忍成就。

【論】

問曰：

先已說等忍、法忍，今何以故復說「大忍成就」？

答曰：

此二忍增長，名為大忍。

復次，等忍在眾生中一切能忍；柔順法忍於深法中忍。此二忍增長作證，得無生忍；最後肉身，悉見十方諸佛化現在前於空中坐，是名「大忍成就」。

譬如聲聞法中，煖法增長名為頂法，頂法增長名為忍法，更無異法增長為異。等忍、大忍，亦復如是。

復次，有二種忍：生忍、法忍，生忍名眾生中忍，如恒河沙劫等眾生種種加惡，心不瞋恚；種種恭敬供養，心不歡喜。

復次，觀眾生無初，若有初則無因緣；若有因緣則無初，若無初亦應無後。何以故？初後相待故。若無初後，中亦應無。如是觀時，不墮常、斷二邊，用安隱道觀眾生，不生邪見，是名生忍。

甚深法中心無罣礙，是名法忍。

問曰：

何等甚深法？

答曰：

如先甚深法忍中說。

復次，甚深法者，於十二因緣中展轉生果，因中非有果，亦非無果，從是中出，是名甚深法。

復次，入三解脫門：空、無相、無作，則得涅槃常樂故，是名甚深法。

復次，觀一切法非空非不空，非有相非無相，非有作非無作；如是觀中心亦不著，是名甚深法。如偈說：

「因緣生法，是名空相，亦名假名，亦名中道。若法實有，不應還無；今無先有，是名為斷。不常不斷，亦不有無；心識處滅，言說亦盡。」

於此深法信心無礙，不悔不沒，是名「大忍成就」。

【經文資訊】大正藏第 25 冊 No. 1509 大智度論

中論 觀因緣品 第一(十六偈)

龍樹菩薩造

梵志青目釋

姚秦三藏鳩摩羅什譯

不生亦不滅 不常亦不斷

不一亦不異 不來亦不出

能說是因緣 善滅諸戲論

我稽首禮佛 諸說中第一

諸法不自生 亦不從他生

不共不無因 是故知無生

【經文資訊】大正藏第 30 冊 No. 1564 中論